

# p o e s i s

di Giovanni Lorenzoni

## LA PLANTE DI MALVON

*Biel passànt denànt ché ciase  
buti i voi sun t'un barcòn...  
Là jé simpri, comè in suase,  
une ciarte... pôc di bon.*

*Qualchi volte 'e mi cimie,  
mi fàs segno di là sù.  
Jo no 'i badi e passi vie —  
Agnul miò, tu sàs ben tu...*

*Chei che notin la comèdie  
pensaràn: vè, ce murbin!  
Pensaràn: cemùt si puèdie  
sei tant sèrio e tant cretin?*

*Ma chei tai no san, ninine,  
chè a cialà sun chel barcòn  
no m'indùs ché... signorine,  
ma une plante di malvòn.*

*Dut un bâr colôr di rose  
chel malvòn, quan' c'al è in flôr.  
E, savès, la mé morose  
'e à i lavrùz di chel colôr.*

*E cumò che, frute o spose,  
doprin dutis il carmin,  
doi lavrùz colôr di rose  
come i siet, son alc di fin.*

*L'è par chest che quan' c'o passi,  
ciali simpri chel barcòn,  
e a chei altris ur 'e lasst  
ché storute... pôc di bon.*

## PRIMEVERE

O ninine, jê cà la primevere:  
'o la sint in chest aer pi lizerin,  
'o la viôt tai colôrs di cheste sere.

La câmpagne jê inmò, in qualchi sgiavin,  
sblanciade di nêf; ma vie pes cisis  
'o sint bielzà c'al ciante il gardelin.

O ninine, sai ben che tu ti visis  
de primevere, tu, dal nêstri amôr,  
âncie se in chest moment no tu m'al disis.

Ancie in ché volte 'e jere intòr intòr  
la nêf, là su lis monz, ma lis zornadis  
erin dolcis di lûs e di calor.

E in chest moment mi pâr che sein tornadis  
chês oris plenis di felicitât.  
a consolânus des penis passadis;

e mi pâr che, lant fur, subit voltât  
il ciantòn, tu tu vebis di vignîmi,  
ninine, incuintri plene di bontât.

Tu mi slungis lis mans come par dîmi  
ce c'al ti indete prepotènt il cur  
e che la vôs inmò, no rive a esprimi.

E fissant chel to voli cussì pur,  
'o mi plei a bussâ ché biele rose  
rosse de to bocîute, intânt c'al mur

il soreli, de muart plui sflandorose.